

VENGTE!

Samaritan mihoih pa thu honggen na-ah (Lk 10:25-37), Topa Jesu in tua Samaritan pa mahbangin ihvengte ih it siamding honghilh hi. Ih vengte itsiamna in, ei ut le utloh hi loin, Topa hongsaawl nasep ahihi. Tua hi napi in, nisim ihnuntak na-ah, Topa honggen 'ihvengpa/nu' in kua hidinghiam cih ihtheih khakloh ni leh hun tampi tak i nei hi. Lamkhatpan in genle hang, kua in kavengpa hiam cih i thei khakei theizel hi. Tulai tak mahmahin kavengpa kuahiam ci'n, khuadak in lungngai leng ihvengpa kua hidinghiam? Na gei a ompa, na innveng a tengpa, na naseppih pa/nu, nalawm khatpeuhpeuh pen navengpa/nu nasa khadinghi. Tua in mihing ngeina tawh kizui a, lawm leh gual leh vengneihna hi a, Topa Jesu'n honggen **navengte na it in** acihna sungah tuate nagen masa lo hi. Samaritan mihoihpa thugenteh na-ah, kua in kaveng hiding hiam cih, kua in i veng hidinghiamcih thu hong hilhcian hi.

Samaritan mihoihpa leh natna athuakpa bangci in kiveng thei hiam? Ahihkei leh, Samaritan pa leh tua natna athuakmi pa bangci in 'vengmi' suakthei uhhiam? Samaritan pa in tua satgawp bawlsiatna athuakpa tawh ki khuakhat hiding hiam? Kithei ngei hiding hiam? Hi thute i ngaihsut ciangin, Laisiangtho sungah tuabangthu ihmu hetkei hi. Amau te tua mun, tua hun in, vengkhat asuak ahi uhhi. Bangthu in tua minih te vengkhat suaksak hidinghiam cih thu in, thuhoih mahmah khat hi a, Topa Jesu honghilh thuzong ahihi.

Tua hi leh, thudangkhat ihngaihsun paklaiding hi. Tua minih te sungah kua in kuavengpa suakhiam cihthu ahihi. Migilo te bawlsiatna athuak mipa in Samaritan pa ii lawmpa, vengpa asuak hizaw ding hiam? Ahihkei leh Samaritan pa in, migilo te bawlsiatna athuakpa ii lawmpa asuak hizaw ding hiam? Ahihkei leh amaunih tua mun ah **veng** suaktuak hi dinghiam? Laisiangtho sungah, Topa Jesu in honghilh na-ah, tuanih te tua ni in vengkhat suakkhawm hi, cilo hi. Ahi zong

in, *Samaritan pa in tua satgawpbawlsiatna athuak mipa ading in vengpa suakhi* cih thu ahihi.

Samaritan mipa in satgawpbawlsiatna athuak mipa ading in, tua ni-in **vengpa** suak hi. Hih thu tawmkha i ngaihsun laiding hi. Atom in ci leng, Topa Jesu in eite pen venghoih te hong suaksak nuam hi. Venghoih nasuak un hongci ahihi. Tua hi leh i vengpa, i vengnu in kua himawk ding hiam? Samaritan mihoiha mahbangan, eite huhna, hehpihna leh eite panpihna akisam penpen mi ihmuh theihding leh tua mite ii vengpa/nu ihsuahding ahihi.

Tua hileh bangan, Topa deihna bangan venghoih ihsuah nang hongkhak tanthei hiam cihthu zong athupi mahmah khat hong suak hi. Bangtengin venghoih pa/nu i suah nadingpan hongkhak tanthei hiam ihcih ciangin;

Pasian thu kizuisak in, Pasian deihna ih phawkkhaklohna,

Thunget lasak, biakinn paina te bek, Pasian nasep, Pasian deihna sa in, kua mah olmawh lohna, (Spiritual pride)

Pasian na kisemsak in, Pasian ki umsakin ahizongin, kuamah tawh kilem theihlohna (veng nei theilo cihna hi).

Pasian tungah i upna te leitung thuphasan na bek dinga ngaihsut khak na,

Biakinn te, thunget hunte, kikhopna inn te bekah Pasian hoihna, Pasian vangliatna te leh Pasian itna te phawk in, nisim nuntakna, ciahna kuanna, nekna dawnna, vaksuk vaktah na te ah, i up Pasian in banghongsawl a, bangsem ding hongdeih hiam cih phawkkhak ngeiloh na,

Laisiangtho sung leh kikhopna te bek ah, Pasian a om sa in, i lawm igual te, cina luna te, genthei tanggah te, pi teek, pu teek te, aki pan, belhding anei lo, muanding anei lo, suanding anei lo mite sung leh amau te tungah Pasian hoihna, hongit na muhtheih loh na,

Pasian pen mite tungah hehpih nasep natawh phat a,
biakding ahih lam phawkkha lo in, lasa in khutbenga
phatding bek in ngaihsut khak na te ahihi.

Hih te kantan in, Jesu Topa hangin mite ading venghoih te
isuahzawh nang, huhpa Khasiangtho makaih na nau-i-ah ki-ap
in, mapangkhawm ciat ni.